

Umsagnir viðskiptamannaráðs vegna netmála (C2) um kerfisþjónusut útg. 2.0

Samtals bárust umsagnir frá þremur aðilum, Orku Náttúrunnar, Landsvirkjun og Samtökum iðnaðarins. Eftirfarandi umsagnir bárust.

Orka Náttúrunnar

Umsögn / almennar hugleiðingar um netmála C.2.

Orka náttúrunnar (ON) þakkar fyrir að fá tækifæri til að rýna nýjan netmála C.2. Á vefsíðu Landsnets er tilgreint „...Markmið endurskoðunar á netmálanum er að tryggja aukið aðgengi mismunandi viðskiptavina að kerfisþjónustu og auka samkeppni á markaði“

On telur jákvætt skref að auka samkeppni og fagnar þessu skrefi. Í því ljósi er jákvætt að sjá að ný skilgreining hefur bættst við, 2.1. *Bjóðandi*, en þeir geta verið vinnslufyrirtæki eða stórnotendur.

Svo virðist þó sem að það vanti að tilgreina kröfur til stórnotenda, til jafns við vinnslueiningar, á nokkrum stöðum í drögunum. Í köflum 4.3. og 4.4. er tilgreint hvert lot vinnslueininga eigi að vera, en svo virðist sem það vanti að tilgreina samsvarandi kröfu um breytt afl hjá stórnotenda, ef til þess kæmi að stórnotandi byði reiðuafli til afnota vegna truflana. Líklega mætti skoða allan netmálann með það fyrir augum hvort kröfur séu heimfæranlegar upp á stórnotendur til jafns við vinnslueiningar án sérstakra útskýringa.

Þá er þeirri spurningu varpað fram, hvort nauðsynlegt skilyrði sé í grein 4.3. að reglunareiningar séu fjarstýranlegar frá orkustjórnkerfi Landsnets. Væri hægt að hafa hraðvirkar merkjasendiar milli stjórnkerfa Landsnets annars vegar og stjórnkerfa stórnotenda eða annarra framleiðenda hins vegar?

Ástæða þessarar spurningar er sú að nú þegar er virkjunum Landsvirkjunar stýrt frá Landsneti. Mögulegt er að samkeppnisaðili á framleiðsluhlíð sé hikandi um að eftirláta Landsneti sínar stýringar þar sem hann væri í beinni samkeppni við Landsvirkjun. Á sama hátt gæti mögulega stórnotandi verið hikandi við þetta fyrirkomulag, því líklegt er að Landsvirkjun eigi í viðskiptasambandi við viðkomandi aðila. Þ.e. þegar / ef starfsmenn eða stjórnendur Landsvirkjunar koma að sinni stjórnstöð þá gætu samkeppnisupplýsingar blasað við, þ.e. staða viðkomandi aðila á markaði.

Samtök iðnaðarins

Umsögn um drög að netmála Landsnets, C.2 Skilmálar um kerfisþjónustu Landsnets hf.

Samtök iðnaðarins fagna framkomnum tillögum á netmála C.2 Skilmálar um kerfisþjónustu Landsnets hf. birt á vefsíðu Landsnet þann 12. janúar sl. Samtökin hafa talað fyrir því að stórnotendur geti tekið að sér hlutverk í stýringu flutningskerfisins líkt og hér er lagt til. Stórnotendur geta upp að vissu marki aðlagð sína framleiðslu og raforkunotkun til skemmri tíma þegar þörf er á að stýra álagi í flutningskerfinu. Fyrirtækin geta því tekið þátt í reiðuafli- og reglunaraflsmarkaði og spilað þannig hlutverk við að bæta tæknileg gæði stýringar og öryggi í raforkuflutningi.

Samtökin hafa einnig talað fyrir því að markaðslausnir verði nýttar í auknu mæli á raforkumarkaði og gagnsæi orkuverðs aukið. Með því að stórnotendur taki þátt í að þjónusta Landsnet á þennan hátt og taki þátt í útboðum þá eykst gagnsæi orkuverðs og eðlilegra samkeppnisverð myndast.

Til að hægt verði að koma skilmálunum í fulla virkni þarf að skoða tæknilega getu fyrirtækjanna til að taka þátt í markaðnum, kostnað við að uppfæra stjórnkerfi þeirra, greiðslur veittar fyrir þjónustuna eða skilmála í útboðum. Einnig þarf að skoða viðskiptalega hlið málsins, hvort fyrirtækin þurfi til að mynda orkusöluleyfi og hvernig þetta hefur áhrif á samninga. Samtökin eru tilbúin til að vinna með Landsneti að framgangi málsins.

Samtökin vilja að þessu tilefni koma með hugmynd um enn frekari útfærslu á þátttöku stórnotenda í viðskiptum Landsnets. Skoða má möguleika á að stórnotendur sjái sjálfir um töp vegna flutnings orku sem þeir kaupa. Fyrirtækin gera þá ráð fyrir því við kaup á orku að töp verði í kerfinu og fá ekki afhent alla orku sem þeir kaupa. Miðað verði við töp í kerfinu almennt eins og Landsnet gerir grein fyrir þeim. Er mikilvægt að skoða hagkvæmari útfærslur á meðferð tapa í kerfinu enda hefur verð á töpum hækkað umtalsvert á undanförunum árum, samkvæmt upplýsingum á heimasíðu Landsnets, og fáir aðilar bjóða í töpin.

Gerðar eru nokkrar efnislegar athugasemdir við drögin að netmálanum:

Varðar gr. 2.5

Kerfisþjónusta er hér skilgreind sem þjónusta bæði flutningsfyrirtækis og dreifiveitu. Annars staðar í netmálanum er fjallað um kerfisþjónustu sem þjónustu flutningsfyrirtækis eingöngu. Í raforkulögum er talað um kerfisstjórn sem verkefni flutningsfyrirtækis og fjallað er um þjónustu þess á nokkrum stöðum í lögunum. Skilgreiningin getur því verið villandi

Varðar gr. 2.6

Skilgreina þarf betur hvað átt er við með lot S

Varðar gr. 2.10

Hér er vísað til framleiðslueiningar stórnotenda en hætta er á ruglingi þar sem framleiðslueining raforku er einnig notað.

Varðar gr. 4.5

Skýra má greinina en óljóst er hvort gerður sé samningur við einn eða fleiri aðila þar sem bjóðandi er ýmist í eintölu eða fleirtölu.

Landsvirkjun

Með vísun í beiðni Landsnets um umsögn um netmála C2 þá gerir Landsvirkjun eftirfarandi athugasemdir við drögin að netmálann um kerfisþjónustu Landsnets hf.:

- \(1) Í grein 4.3 er tilteknað kröfur til vinnslufyrirtækja vegna reiðuafis til tíðnistýringar, en einungis vísað til samkomulags milli Landsnets og stórnotenda varðandi kröfur til stórnotenda. Rétt væri vegna samkeppnissjónarmiða að tiltaka nákvæmlega hvaða kröfur eru gerðar til stórnotenda í þessu sambandi.
- \(2) Í skilmálunum er greint á milli „reiðuafis til tíðnistýringar“ og „reiðuafis vegna truflana“. Slík sundurgreining hefur ekki hingað til verið notuð í samningum við Landsvirkjun, sem hafa langan gildistíma, þ.s. einungis er talað um „reiðuafi“. Æskilegt væri að Landsnet gætti þess að skilmálarnir væru í samræmi við gerða samninga í þessum eignum.
- \(3) Vakinn er athygli á því að í kafla 5.2. er vísað varðandi spennustýringu í aflstöðvum í reglugerð um gæði raforku og afhendingaröryggi nr. 1048/2004. Í reglugerðinni verður ekki séð að fjallað sé sérstaklega um spennustýringu í aflstöðvum heldur eingöngu á afhendingarstöðum í flutnings- og dreifikerfinu þar sem viðskiptavinir taka við rafmagni. Sé það mat rétt er þörf á frekari skýringum í netmálanum.